

INUIT ATAQATIGIIT

INATSISARTUNI



Nuuk, 11. august 2015

Inatsisartut suleriaasianni § 37 naapertorlugu Naalakkersuisunut apeqqut imattoq matumuuna saqqummiuppara:

Ilinniarnissamut qinnuteqarsimasut akuerisaasimanerminnik allakkatigut kalerrinneqarsimasut maannakkut itigartinneqarsimaneranni Ilisimatusarfik ingerlatsineq pillugu inatsit naapertorlugu eqqortumik iliorsimasoq Naalakkersuisut isumaqarpat?
(Inatsisartuni ilaasortaq Naaja H. Nathanielsen, Inuit Ataqatigiit)

Tungavilersuut

Inuit 20-t isumaginninnermut siunnersortitut aamma peqqissaasutut ilinniartunngorsinnaanerminnik kukkuluttornikkut kalerrinneqarsimapput. Kingorna inuit 20-t pineqartut ilinniarnissaminnik kissaatigisimasaminnik aallartissinnaanngitsut kalerriisimaneq aamma kukkuluttornermik tungaveqarnerisooq paaserusuppara.

Nammineq paasinnittaasera naapertorlugu ilinniarnissamut akuerisaanerup tunuartinneqarnera ingerlatsineq pillugu inatsimmut akerliusunnaavoq, taamatullu aamma naak akuersineq kukkusumik tungaveqarluni pisimagaluarpat. Maleruagassat pisinnaassutsillu ersarilluinnartumik paasisariaqarmata tamanna misissortikkusuppara.

Uanga paasinninnera naapertorlugu ingerlatsineq pillugu inatsit naapertoraanni aalajangiineq inummut iluaqutaasusaaq tunuartinneqarsinnaanngilaq, aatsaalli inatsisitigut erseqqissumik periarfissaritinneqarpat tamanna pisinnaalluni. Tamannalu ima kinguneqariaannaavoq inuit matumani pineqartut ilai ilinniarnissaminnik aallartinnissaminnut pisinnaatitaasut. Ilisimatusarfimmit akuerineqarsimasutut kalerrinneqarsimapput. Itigartitsineq attatiinnarneqassappat qinnuteqarsimasut tigusaanissaminnut piunasaqaatit naammassisinnaanngikkaat ersarilluinnartumik uppersararneqarnissaat pisariaqassaaq.

Isumaginninnermut siunnersortitut ilinniarnermut tigusaanissamut piunasaqaatit atuarlugit uanga takusinnaasakka naapertorlugit karakterit aalajangersimasut piunasaqaatinut ilaangillat. Taamatullu peqqissaasutut ilinniarnermut akuerisaanissamut piunasaqaatit atuarlugit ilaatigut ilinnialernissamut akuerisaanissamut annikitsumik karakterit aalajangersimasumik imaluunniit karakterit agguaqatigiissinneri ersarissumik piunasaqaataanngillat. Tamanna tungavigalugu ilinniartunngorniat matumani pineqartut akuerisaasimaneramik tunuartsinerup maleruagassanut akerliunersooq nalorninartorsiutaasinnaavoq.

Apeqqutigineqartoq ullut suliffiusut qulit qaangiutsinnagit akineqarnissaat kissaatigissavara.